

E AÑA AKI COLEGIO ARUBANO PARIBA TA BAY CUMPLI 20 AÑA DI EXISTENCIA


Seccion Hubentud" den Movecion a bishita Colegio Arubano na San Nicolas, unda a entrevista e docente encarga cu ta Meneer Nagel Matthew y despues a conversa cu un grupo di alumno di HAVO-3de-1.

Meneer Matthew su funcion ta di "School Leider". E tabata co-rector di Colegio Arubano, di cual cargo el a pidi retiro, pero el a worde pidi pa asumi e cargo di guia pariba di brug. Na momento cu e ta ausente ta un co-rector of corectrise ta reemplaze.

"Esey no ta e situacion ideal, pero e no ta bay asina facil pa tene un cabesante vast. Ideal tabata si tin un persona encarga continuamente" e ta bisa.

Meneer Matthew ta conta cu e seccion di pariba di brug tabata semper un deseo di mayor y muchanan di San Nicolas, pero a dura añanan largo pa bin realiza esaki.

Colegio Arubano (situa na Oranjestad) a habri su porta na aa 1959, y na augustus 1977 e seccion di San Nicolas a mira luz di dia, cual intencion ta pa muchanan biba den e distrito aki y vecindario sigui prome, segundo y tercer aña, y e ultimo añanan pabao. Na prome instancia Colegio a ocupa e edificio di School Don Bosco, pero e localidad no tabata adecua, y mester a sali for di dje. Asina e school a move pa e edificio cu antes tabata Benilde School, cual a worde amplia, renova y adapta na e tipo di enseñanza avanza aki.



Otro aña Colegio Arubano na San Nicolas ta bay cumpli 20 aña di existencia.

VENTAHANAN: Meneer Matthew ta indica cu Colegio Arubano di San Nicolas tin su ventaha y desventahanan.

"E ventaha ta cu nos muchanan no mester lanta asina tempran, y cu debi cu e school ta chiquito tur alumno no

conoce otro, y e docentenan por duna nan mas atencion. Nos por tin bista riba loke ta pasando debi cu e klasnan ta mas chiquito, nos studiantenan ta mas motiva y mas abierto pa siña, mas 'willing' no obstante cu nan falta mas facilidadnan compara cu pabao, specialmente den horanan liber no tin hopi cos pa ofrece".

Fuera di esey e lugar un tiki scondi una Colegio Arubano ta ubica na San Nicolas, ta genera menos peligro rond di e muchanan.

Actualmente Colegio Arubano di San Nicolas ta conta cu mas of menos 150 alumno, segun Meneer Matthew ta indica.

"Colegio en general ta creciendo y birando "un fabrica". Klas ta crece asina grandi cu no por duna e alumnonan tur atencion. Pesey e unico problema cu nos tin ta cu net nos alumnonan cu tabata e mehornan ora nan bay pabao no ta e caso mas. Nos ta constata esaki y podise nan no tin e instrumentonan adecua ora nan worde laga los den e "fabrica". Durante e ultimo añanan di e 20 alum-

nonan mehor solamente 2 ta bay over pabao", Meneer Matthew ta comenta.

E ta kere cu e motibo por ta sinta den e hecho cu Colegio Arubano na Oranjestad ta mas abierto, e muchanan tin libertad total, mientras cu na San Nicolas nan ta mucho mas protegi, y nan no ta prepara pa haci uso di e libertad cu nan ta haya pabao.

AMPLIACION DI COLEGIO PARIBA:

"Ampliamento di Colegio pariba ta un deseo tanto di alumno como di mayor. Pero esaki ta un asunto politico. E probabilidad di ampliacion a worde sugeri na diferente nivel. Bo por expande e school door di ofrece diferente paquete pa cada school, y asina mantene un balance di

ocupacion, no segun e klasnan pero segun e paquete.

Esaki ta un alternativa, otro ta mantene e grupo mas cerca di nan vecindario di manera cu nan por keda te e ultimo klasnan na e mesun school".

Alternativanan tin, pero e tipo di enseñanza aki ta hopi costoso. Mester di docentenan completamente califica y no por haya nan facilmente na Aruba mes. Pa amplia Colegio Arubano di San Nicolas mester crea un local mas moderno pa e parti practico, loke ta costa algun par di milyon di florin, segun Meneer Matthew ta comenta.

E ta kere si cu aunque e gastonan ta enorme mester duna esaki prioridad, pasobra "e frutanan bo ta haye bek".